

argitaratua. Ondoren publikatu zituen beste bi obra: *Gauaren atzekaldean* eta *Bizitza pil-pila*.

Ongi merezitako omenaldia, beraz, ziurrenik segida ere izango duena.

G.E.

ARGIA aldizkariaren 75. urteurrena

Aurten ospatu du "Argia" aldizkariak sortu zeneko bere 75. urteurrena. Urriaren erdialdean eskaini zuen 1.500. ale berezia.

Argia, gaur egun, zenbait pertsona, gazteen eskuetan indartu eta garatu den aldizkari sendo bat bilakatu da. Horren adibide dira ARGIA-k bai teknolo-

gia berria eta bere egoitza berria Lasarte-Orian estrainatu izana. ANTZA inprimategiarekin eta APIKA informatika etxearekin elkarlanean eman dute urrats berri hau, ARGIA-ren hobekuntzan ere nabarituko dena. Gure zorionik beroena eta, nola ez, urte askotarako.

EUSKADI sariak

Gasteizko Gobernuak eta Diputazioek antolatzen duten Euskadi Sari honek lau sari ditu berez, baina urteko bi sari bakarrik konbokatzen dira: iaz nobela eta antzerkia eta aurten saiogintzari eta poesiari egokitu zaie.

Euskaraz zein gaztelaniaz emandako sarien artean, Jon So-
dupe azkoitiarra, saiakeran eta Amaia Iturbide bilbotarra, poesian izan dira aurtengo Euskadi

Literatur sarien irabazleak. Gaztelaniaz, berriz, Eduardo Gil Bera nafarra, saiakeran, eta José Antonio Rodríguez Medeiros orensarra poesian.

Mikel Etxeberria Kultura sailburuordeak adierazi zuenez, partehartzea handitzen ari da urtetik urtera, eta, horrela, aurtengoan, 24 idazlan aurkeztu ziren euskaraz eta 49 gaztelaniaz, horietatik 43 poesian eta beste 6ak saiakeran.

Euskarazko lanen epaimahaia Mikel Azurmendik, Patxi Goenagak, Juan Otaegik, Ibon Sarasola eta Felipe Juaristik osatu zen. Felipe Juaristik ezan zigunez: "Saiakera alorrean kalitate handiko lanak jaso ditugu, baita arlo honetan bete- betean sartzen ez diren baina oso interesgarriak diren beste idazlan batzuk ere, hauen artean, esate baterako, atsotitzei buruzko bat, argitaratzea merezi dutenak".

Jon Sodupe, Zumaiako Ikastolako irakaslea da eta lehendik ere "Mikel Zarate" saria 1983. urtean eta "Irun saria" 1990.ean eskuratua da. Oraingoan aurkeztu zuen saioa "Ilustrazioaren bidetik argi berri bila Frankfurten", saiakerak zientzia, etika eta politikaren etika bezalako gaiak ukitzen ditu, Habermas filosofo eta soziologo alemanak ezarritako ildoari jarraituaz, eta, Felipe Juaristik esan zigunez "erderaz argitaratzeko ere batere lotsarik ez duen lana da, beste hizkuntzetan egiten diren azterketen adinako maila badu eta".

Poesiari buruz, oster, ez zen epamahiaren sentzaioa hain ona izan "olerkien erdiak behintzat txarrak eta horietako batzuk oso

txarrak iruditu baitzaizkigu". Irabazleak, ordea, hizkuntza "gozo eta argia" erabili du bere "Gelak eta zelaiak" idazterakoan, baita "metafora aberatsak ere, egileak naturarekin lotura estua duela adierazten dutenak.

Amaia Iturbide Mendinueta, irabazlea, Bilbon jaioa da eta Arbizun hazia. Gaur egun Getxon bizi da. Euskal Filologia ikasketak burutu zituen Deustuko Unibertsitatean. Artikulu asko idatzi eta argitaratu ditu, han hemenka, aldizkari eta egunkari desberdinetan kultura gaiak jorratuz, batez ere, literatura eta artea. Bidebategi, esan dezagun EGAN aldizkariako kolaboratzaileen artean dugula. Bi ikerlan eginak ditu, biak argitaragabeak: *Jean Etchepareren idazkera* eta *Euskal kontakizun tradizionalaren sustraiez*. Argitaratuak, bestalde, hiru poema liburu: *Eskaileraren bi aldeetan* (Erein, 1986), *Itzalbidea* (Erein, 1992). Azken honek kritika saria jaso zuen eta *Gelak eta zelaiak*, 1994.eko Xabier Lizardi saria.

Zorionak, beraz, bai Jon Sodupei eta bai Amaia Iturbideri.

G.E.